

# UPM, UTM nafi sesi temu duga terbuka program diploma

**Kuala Lumpur:** Universiti Putra Malaysia (UPM) dan Universiti Teknologi Malaysia (UTM) menafikan pembabitan dalam sesi temu duga terbuka melanjutkan pengajian bagi program diplamanya yang dijadualkan di Petaling Jaya, Sabtu ini.

Timbalan Naib Canselor Akademik dan Antarabangsa UPM, Prof Datuk Dr Mad Nasir Shamsudin, (**gambar**) berkata penggunaan logo UPM dalam surat tawaran temu duga atas nama Unit Pengambilan Khas Pelajar, Kementerian Pendidikan, adalah satu penipuan.

Beliau menegaskan, proses permohonan dan pengesahan penawaran tempat bagi semua program pengajian IPTA hanya dilakukan menerusi sistem dalam talian Unit Pengambilan Universiti (UPU) tanpa sebarang temu duga atau bayaran.

## Tak lantik agensi

“UPM tidak terbabit dalam hal ini dan tidak pernah melantik mana-mana agensi

untuk menjalankan temu duga bagi pihak kami. Logo UPM disalah guna untuk melakukan penipuan.

“Proses yang betul bagi memohon dan memastikan penawaran tempat ke IPTA adalah menerusi UPU. Surat tawaran dike-



luarkan universiti dengan kepala surat UPM akan dihantar kepada calon yang berjaya,” katanya ketika dihubungi di sini, semalam.

Ketua Pentadbiran Akademik dan Antarabangsa UPM, Rosdi Wah, berkata ada banyak keraguan pada surat tawaran itu, antaranya syarat kelayakan kemasukan yang lebih rendah daripada IPTA serta ketiadaan nama pegawai yang menandatangani surat.

“Syarat kelayakan masuk bagi program diploma adalah minimum lima kredit bukannya tiga kredit seperti dinyatakan dalam surat. Pada bahagian tandatangan juga tiada nama dinyatakan, sekadar diletakkan jawatan Ketua Unit Pengambilan Khas Pelajar.

## Salah guna logo

“Tambah meragukan apabila logo agensi yang tiada kaitan dengan institusi pendidikan, contohnya, SIRIM, disertakan dalam surat itu,” katanya.

Di **Johor Bahru**, UTM tidak menerima sebarang aduan mengenai sindiket menipu pelajar lepasan SPM dengan mengenakan bayaran bagi menghadiri sesi temu duga kemasukan.

Bagaimanapun, Penolong Pendaftar Pejabat Hal Ehwal Korporatnya, Sabri Ahmad, berkata UTM memandang serius perkara itu dan akan menyiasat jika ada aduan daripada ibu bapa atau pelajar.

“Penggunaan logo dan nama UTM tanpa kebenaran adalah satu kesalahan dan kami akan melakukan siasatan,” katanya ketika dihubungi, semalam.